





空同先生集卷第二十四



北郡李夢陽撰

詩 五言律詩一百首

贈答

陶行人宅贈

酬京師友人見寄

繁臺餞客二首

送秦子

聞李公寓郊園寄贈

答伊陽殷明府見寄

寄殷明府二首

送鮑生下第南歸

杭刑部淮談其師齋

南陽宅訪徐禎卿

張子抱疴避諠山寺關別旬月作此懷寄

寄錢水部榮

風夕柬徐子



送舍姪木還汴

得何子過湖南消息

憶何子

何子至自滇

春歸東謝負外

晚過序上人

再過序公月夜

晚過定上人

秋雨訪李鍊師

送鮑光雄南歸

甲生聞余浩然訪於東郭花下酒集二首

余氏園庄二首

庚午十月余氏東庄

送人還關中

寄贈內弟玉園居

毒熟在獄呈陳運使數暨潘給事中希曾

延慶觀訪陳州王君

徙泰公方丈秋夜

康狀元話武功山水

發京呂狀元送出城

答何子問訊三首

阻雨明港寄何子二首

賢隱寺集贈

漢上遇鍾參政

贈鍾子漢上

獨對亭贈人過訪

發貴溪高子輩舟送

寄贈林都御史二首

贈何君辭官歸里

新喻遇薛子送贈二首

立春寄揚君京口

顧子謫全州贈二首

與樾堂子晚步四首

九日楚山太華君同登

送鄭生南歸二首

繁臺書院同邊子三首

臺館訪李秀才濂

寄許監察二首

東黃子二首

許君話遊感舊四首

酬唐禮部見寄二首

贈張工部汴上



答許監察百泉和章兼泄所懷三首

和許監察聞報之作 送張監察還朝

伏日許君館亭晚酌二首送陳左使赴貴州二首

早秋許君監察見過 寄王贛榆

寄李濂兼呈何子 寄王生

酬寄徐子秋日登鏡光閣見憶

贈孟明府自桂林量移汶上

寄王子蘇州三首 寄孟縣張明府

酬徐子春日登樓見寄

送許監察還朝二首 再贈許君

贈答

陶行人宅贈

大道僧門對蕭然陶舍深未論五楊柳真懸一素琴  
坐向霜烟夕時聞鴻鴈音城笳流海思邊月起秋陰  
苦勸蒙騰醉應懷長別心但看得雲翼翼真誰竟尋

酬京師友人見寄

浮雲悲故國積水起鳴雷不見長安日愁登古吹臺  
故人三月別天上一書來欲問經行處山中杜若開  
繁臺餞客二首

異地同為客看花更屬秋雲連去國目鴈引望鄉愁  
隴對迷關道吳山蔽驛樓忍將宋玉恨還共李膺舟



萬里遊燕客十年歸此臺只今秋色裏忍爲菊花來  
霜露凝秦望衣冠餓楚材不堪分袂苦落日一鴻哀  
送秦子

梁國秋砧滿范陽風葉稀如何故人去不與鴈同飛  
北路薊門古寒天易水微君行莫怨霧霜日指南輝  
聞李公寓郊園寄贈

幾日棲東嶼昔林今若何主人能醉客世事且狂歌  
黃鳥晴吟竹紅蕖晚出波自憐門士未眠病阻鳴珂  
答伊陽殷明府見寄

古縣垂新柳獨吟酬好春琴清山在眼花碧酒隨人  
柰此河陽少曾於漢署親郵筒定不惜有句念沉淪

寄殷伊陽二首

自枉去年札約爲嵩少行夢常飛洛水詩屢到伊城  
蘿殿王喬鳥花臺子晉笙君行奮雙翮吾此學長生  
二

可怪伊陽尹冬來不寄詩徒懷白雪調况逼暮雲時  
日落山城黑風鳴邑樹悲身危屬撫字爲爾一凄其  
送鮑生下第南歸

只期橫直上豈料戢麟歸抱玉終難掩投珠安所希  
秋風吹獨馬落日照征衣南到江亭上還瞻北鴈飛  
杭刑部東卿談其師鳧

國難逢驕虜時危惜俊才鹽車在泥淖驥驥亦悲哀



片月清秋照商風一夜來思君不相見惆悵對西臺  
南陽宅訪徐禎卿

東閣能留第南人暫亦居琴書遷卧內騎馬到堂除  
殘樹喧巢鵲微風走壁魚追思秉鈞日冠蓋爛盈閭  
張子抱疴避誼山寺闊別旬月作此懷寄

楚楚張公子悲吟度歲華棄官臨野寺服習向出家  
石髓遇不識黃精春始花洞中日月秘強食勝丹砂

寄錢水部世恩

雪時揮袂別見雪卽懷君河館冬難暮沙洲晚更雲  
清爲蒼水使靜對白鷗群昨夜尋君夢微茫路不分

風夕柬徐子

嚴冬萬卉寂朔吹迥添愁嶺日微含照川雲半逆流  
頻齋忘肉味乍冷覓羔裘差勝山陰夜能孤訪戴遊

送舍姪木還汴

天涯逼除夕念爾獨歸人夜宿蘆溝雪朝逢易水春  
爲駒先汗血藏劍莫愁身到及張燈候遙知戲彩頻  
得何子過湖南消息

及遇荆門借洞庭秋已淒湘江饒苦竹幾聽鷓鴣啼  
馬援留銅柱王褒祀碧雞向南衝瘴癘藥物去曾携

憶何子

其兄時爲  
巴陵知縣

憶爾辭京日余歌萬里行經秋無過鴈索處若爲情  
去已窮滇海歸應滯岳城鳳凰池上草春到爲誰生



何子至自滇

醉折荷花別寧期花復開川原一回首雲日共徘徊  
知向首蠻去云從三峽來進舟雖一賦胡棄楚陽臺  
春歸東謝負外

寂寂鳴禽變陰陰弱絮飛煙花從客久風雨會春歸  
且盡追隨飲休傷節序違無端臨暮景番憶謝玄暉  
晚過序上人

塔日微微墮禪居隱隱涼軒開惟有竹坐定始聞香  
萬古風塵地三生水月鄉頻來尋白社不爲禮空王  
再過序公月夜

歲已殘冬逼月餘今夜圓光侵僧磬發清徇佛樓懸  
鳴鳥疑深對高雲靜暮天夙心如解此更欲問何禪  
晚過定上人

中秋鏡閣臨向晚過西林月自湖間動鵲翻祇對深  
靜宜鐘磬發寒更塔廊陰萬物輝今夕悠悠塵外心  
秋雨訪李鍊師

便靜尋丹侶飛梁度赤城洞花含雨落階鶴下松迎  
雲霧生仙袂秋寒咽鳳笙余情會浩蕩先品步虛聲  
送鮑光雄南歸

世事風波遠悠悠素髮新乾坤萬里色江海獨歸人  
岼柳牽行舫汀花照暮春山中采芳杜好薦北堂親  
田生聞余浩然訪於東郭花下酒集二首



花林吾自酌見覓爾情親轉覺花饒笑  
番驚蝶趁人百年秦地客萬里宋宮春  
酒罷烟城暮無言對愴神

二

令兄真國士吾子更超然同住孤城裏  
相邀東郭前攀桃映落日折柳向春天  
更有梁臺約風塵入暮烟

余氏園庄二首

無端二月至不分百花開林坐斜陽入  
郊暄沙色來穠葩偏近牖弱柳故臨杯  
共是天涯客無辭酌酹迴

二

百年吾不醉一歲幾何春况接桃花暮  
難禁柳色新君爲遊世客余是放歌人  
爛熳題詩徧林鶯莫漫嗔

庚午十月余氏東庄

南客招延屢東遊野興高乾坤侵爾殺  
雲木半蕭騷暖澤喧饑雀冬林秀晚桃  
時清還浪跡痛飲笑吾曹

送人還關中

見君驅去馬忽起望鄉思華嶽寒逾峻  
涇河繞自遲躬耕爲谷口把釣憶皇陂  
何日一尊酒南山對不移

寄贈內弟玉園居

城市憐余獨鄉居見爾稀年華仍雪樹  
疾病有柴扉烟起浦欲暝沙寒鴻自飢  
一身固不保萬事莫嗔違

毒熱在獄呈陳運使數暨潘給事中希曾

此地饒炎熱南中恐未然有風畚助暑  
揮汗欲成泉



鳥避棲深葉蠅喧集滿筵百憂吾共汝流涕北風篇  
延慶觀訪陳州王君

珠閣晴逾麗仙林午自和我來驅獨馬笑爾溺雙鵝  
臘雪融樓薄溪風傍竹多雖非宛丘習吾醉亦婆娑  
徙泰公方丈秋夜

秋林風色暮游子念征衣鴻鴈俱高起江山獨未歸  
月臨蓮室靜螢傷竹林微喜對離羣友吾生本息機  
康狀元話武功山水

夢寐關中好連年未得歸側聞武功勝佳興益翻飛  
水繞褒斜出山從盤屋圍因君覓水竹爲買釣魚磯  
發京呂狀元送出城

旭日清霜麗關河獨鴈飛征蓬各自遠會面後應稀  
渭水縈秦塞南山繞漢畿料君鄉思切只恐未能歸  
答何子問訊三首

伊汝投簪日憐余胃網羅江湖鴻鴈絕道路虎狼多  
萬死還鄉井潛身葺薜蘿天涯歲仍晚無路覓羊何  
二

仲夏辭梁地中秋出夏臺醉行燕市月留滯菊花杯  
日暮千行淚天寒一鴈來亦知張季子不爲食鱸迴  
三

弱冠真憐汝投閑更可哀山高桐栢觀水曲范滂臺  
假寐憑巖柱潛行倚岫梅此時誰借問日短暮寒催



阻雨明港寄何子二首

白日雲猶動青山雨忽來計程今夜會策馬出村回  
月對荆門上天從夢澤開旅燈依港宿吟苦獨徘徊

二

微微山日舒彼美碧山隅信宿猶難遣經年抵重吁  
花含明日艷月助此宵孤久擬申城醉香醪語爾沾

賢隱寺集贈

水落移舟穩山行酒暫隨寺高垂路細林密見僧遲  
樓閣登臨日江淮獨去時不應聊駐此愈重白雲思

漢上遇鍾叅政

長安一爲別十載但書傳我自河南至君來自沔川

偶逢知萬事重會是何年館靜風依馬江鳴雨濯船  
情多看轉默酒後惜分眠明發孤帆疾愁經大別邊

贈鍾子漢上

君爲薇省使幾度紫薇開髮以憂時白舟巡累月回  
漢川驚會面江雨助停杯已約同船下安能曉霽來

獨對亭贈人過訪

孤亭瞰巨壑五老對銜卮日出峰烟起風涼谷對悲  
石泉秋聽急山路晚歸遲異日東南賞應深廬嶽思

發貴溪高子輩舟送

旌旗飛近邑鼓吹送前舟禮餞諸生侍英寮並節遊  
長風驅暝色密霰響寒洲見月帆猶進山陰恨子猷



寄贈林都御史二首

錦水啼鶯起巴山春望微  
干戈滿眼急江漢一舟歸  
花送琴書色霜留斧鉞威  
所傷豺虎亂公也息鷗機

二

諸葛能安蜀穰苴本善兵  
向來優起詔番作急流行  
老益丹心壯憂惟白髮驚  
祗憐川父老涕泣挽歸旌  
贈何君辭官歸里

三年牧夷郡萬里竟歸舟  
瘴離程番雨雪乘江漢流  
琴書頓縣邑五馬向山樓  
棠封苗民種清陰應舊州  
新喻遇薛子送贈二首

故舊日益遠寸心奚所安  
雨留杯酒暫明發楚途漫

炎暑百蠻盡風霜五月寒  
知君近南斗時倚鎮鐻看

二

解劍別此水憐君向桂林  
徒持一杯酒其柰故人心  
瘴癘秋行霽沅湘馬度深  
衡陽雖更遠莫遣鴈書沉

立春寄楊君京口

一水相望隔飄飄楚越身  
北風猶送雨南國暗增春  
雲入金山接波添彭澤新  
妙高峰上酒對酌是何辰

顧子謫全州贈二首

楚城悲遠望君去更悠悠  
十月逢南鴈章江况北流  
寒沙帶宿莽霜日下孤舟  
明發湘東路應添吊屈愁

二



蒼梧遺舜跡白雲秋氣愁君得人文地相傳是此州  
山連夜郎密瘴入桂林收獨有思親淚非緣逐客流  
與樾堂子晚步四首

有伴沙行穩無雲楚望深江湖席下出樓觀鳥邊陰  
共繫南來跡孤帆北逝心徘徊忽復晚朗月散松林  
二

晚俯林烟靜居然盡一城江圍三面白雨過四時清  
沙光偏升月花踈轉喚鶯可言南岫矮青槩斗牛平

三  
北郭浮沙暝西山擁坐真日猶銜殿閣江已下星辰  
禹服苗風雜豐郊劔氣伸獨嗟征艦日歌吹滿城闈

四  
美對沙能秀高花夏不踈江山百戰後登眺兩人初  
楚月垂鮫淚燕山澁鴈書異時羊續壁喜接豫章魚  
九日楚山太華君同登

不入襄陽府秋山每自來那知楚峰上還共菊花杯  
帽落層雲迥風生萬壑開却思羊叔子峴首獨悲哀  
送鄭生南歸二首

梁園杯酒罷江上泛舟歸白日孤帆隱青天一鳥飛  
路分和靖宅潮接子陵磯羨爾隨玄豹還山戲彩衣  
二

挂席南風便烟霞北望深逢人著阜帽采藥鍊黃金



五月三江路扁舟四海心方山有叢桂誰與結雲林  
繁臺書院同邊子三首

壺觴聊首夏文史更孤臺地主更來幾登臨每復陪  
徑蘭迎節秀岩鶴撲驄迴落日凭軒外蒼蒼四嶽開

二

駐賞林紅減登吟野綠圍故人率爾遇時序暗中違  
氣突芒碭斷雲低孟澤飛昔賢誰復此無羨酒酣歸

三

興劇攀巍坐脩然俯日斜亭扶盤石樹岬綴殿春花  
薜服賓游憶青衿閃釣槎綢繆不欲別風野暮鳴笳

臺館訪李秀才濂

季生梁國彥少小事沉冥春日古臺上獨行楓樹青  
花侵映雪壁鳥下草玄亭野闊看無際浮雲似洞庭

寄許監察二首

爲問乘驄使經春北未迴句刪淇竹寫尊泛鄴花開  
昏曉行山外風雲每自來不知銅雀上臨望幾徘徊

二

初擬周三晉何時已百泉吏人跳水外驄馬白楊邊  
坐憶孫登嘯行吟衛女篇倒看峰不極炎日有霜烟

柬黃子二首

約隱情非飾今歸悔即遲田園荒欲盡親友半相疑  
杯酒惟黃子儒門是白眉可能東郭柳日往聽黃鸝



二  
徑菊陶能得田瓜邵獨勤爲農消日月倚杖看風雲  
挿柳俄成樹籠鵝忽一羣不須憂萬事客至且醺醺  
許君話遊感舊四首

幾日離泉上泉香滿繡衣坐談觀水事想見采菱歸  
石柱新留姓山藜亦借威知君薄朱紱興在白雲飛

二

泉館舊曾到跳珠今若何數年魚不小題壁客應多  
照日輸金浪回風散錦湍君令樹齒蓄勿逼古龍窩

三

亭榭逢君復源泉改色流噴珠連地涌仰鏡合天浮

掇蛤曾兼石移家欲狎鷗獵心萌自鄙日往水邊頭

四

昔訪仙潭鯉春陰阻獨行至今看絕頂長日有雲生  
爾昨褰帷過同深把釣情何時掣金鬣携手萬峰晴

酬唐禮部見寄二首

僕踈鹵蕪鄙人也舉世棄焉於唐無一面之  
雅迺今辱拔群之顧偉文法筆吐露悃悞僕  
奚以有此哉

萬事中年懶諸人近日踈不怠惟墨客願見有音書  
倚伏休詢鵬生涯且釣魚問音終缺酒不是草玄居

二



蹈虎看賢達攀龍幾奮飛長歌百年內慘淡萬情歸  
種竹從過檻栽桑不慮衣神交古有在莫遣北鴻稀

贈張工部汴上

天意焚宮殿臣心急棟梁未花辭魏闕酷暑向咸陽  
遇我真傾盖憂時每罷觴塵沙一萬里分手向垂楊

答許監察白泉和章兼泄所感三首

踈迂甘病足天地合藏身未即辭城市何緣謝世人  
恨無山在眼願與鹿爲鄰暑日情真倍蕭蕭水石濱  
二  
吾門客不到永晝雀堪羅竹色間巾拂池涼颭芰荷  
片雲感日卷雙燕掠虫過忽憶臺端使詩成只自哦

三

睡起看雲坐敲門報吏來受書驚鯉躍投李得瓊迴  
思爲源泉劇辭遵比興裁不須共林石三復野情開  
和許監察聞報之作

忽爾西邊信飛傳過洛陽幾首齊豕突何將最鷹揚  
殺氣黃河接烽烟紫塞長籌兵有諫疏早晚達明光  
送張監察還朝

北極星辰入山河斧鉞歸烏爭車鷺疾雨逆盖雲飛  
御柳元搖珮臺花且襲衣聖心虛采納忍使諫書希  
伏日許君館亭晚酌二首

暑閣含風暮林亭透日踈俯地間白羽把酒躍金魚



興觸山花發心同水葉舒孰言臺務劇鎮日有琴書

二

樹色寒文簾池光隱玉壺敞筵真不暑愛客忽忘晡  
烏返爭栖柏魚懽自戲蒲回思闌闐子天地一洪鑪

送陳左使赴貴州二首

萬里洞庭西秋風入五溪瘴天開斧鉞山驛斷虹蜺  
水出牂牁繞城臨井宿低堂間花對紫簫鼓閱雕題

二

郡縣收殊俗封疆託此臣去披炎嶺霧坐使瘴花春  
獠部知徭賦夷官學縉紳誰期召伯對蔽芾五溪濱  
早秋監察許君見過

五柳驄偏繫三山雨乍過夏蟬猶咽竹夕露欲傾荷  
眷此青雲客懷余白石歌相看恨易晚燈火發烟蘿

寄王贛掄

自汝謫東縣朝朝看海頭書纔一紙到別已十年周  
日就晚潮落城浮淮水流知君負楚調激烈向清秋

寄李濂兼呈何子遜

仲言何  
遜字

識汝塵埃際飛騰步步高許身元稷契努力更風騷  
暫亦遊香署終能奪錦袍仲言應過數萬里兩鴻毛

寄王生

重九書新寄他時意獨傷故山吾別久籬菊晚誰芳  
日月徒鴻鴈乾坤尚虎狼松楸圍幾大人發淚千行



醉寄徐子秋日登鏡光閣見憶

歲晚湖間閣秋臨共爾曹路疑銀漢上身近紫宸高  
霜色諸天鏡愬風四海濤別離誰復此檻望獨揮毫  
贈孟明府自桂林量移汶上

少年東邑宰萬里北還人桂已他時苦花須滿眼春  
偶逢思宿昔臨別見交親莫小牛刀試元爲驄馬臣  
寄王子蘇州三首

獨立望南天秋空月會圓此時一尊酒憶爾隔嬋娟  
並馬遊燕日孤舟去越年斷腸今萬里心折暮江前

二

三十烏臺使投冠竟黑頭田園是故里江海有新舟

把酒看鴻舉開牕面虎丘不須嘅今古吾伴鹿麋遊

三

舊交多鬼錄吾子獨仙鄉幸自饒強健何心說廟廊  
稻輸吳郡白橘足洞庭黃飽飯教兒女攤書日滿床

寄孟縣張明府

同年多出宰獨爾得河陽背郭園王屋開門對北邙  
詞章前令掩桃李舊花香何日乘雲起雙鳧入帝鄉  
酬徐子春日登樓見寄

三月垂楊合風花滿帝州伊子直北望爾上幾層樓  
紫塞連天起黃河抱地流春烟動萬里何處覓前遊  
送許監察還朝二首



杯酒豈無友知音誰復多君今萬里去吾柰好春何  
路草隨輶碧山鶯近驛歌尚思文話地驄馬月中過

吾園花爛熳子特駐驄看偶念明朝別先違兩地懽  
勝之元執斧陶氏合投冠去住情俱得離杯莫放乾

再贈許君

緣岬百花開樓船三月迴人依鐵甕望鳥避柏烏來  
禮樂還朝疏山川畫笏才太微遙已入新彩近三台

畫笏虞  
允文也

空同先生集卷第二十四

空同先生集卷第二十五

北郡李夢陽撰

詩 五言律詩一百首

贈答

邊君生日來訪時近中秋不虞雷電二首

繁臺院閣餞沈子之雲南并懷劉子二首

送姪木錫嘉會試 繁臺冬餞翟子三首

丙子生日答內弟璣 雪後寺集夜別王子

早春懷上方寺 春日過李氏因贈

送鄭生 東張含

憇長葛端壁寺偶遇使人王卿齎監察毛君



詩劄到困頓中口占馳寄亦答遊山之約

月夜東張含

送張含

秋日讀王子赴江西時諸曹贈行篇什感賦

繁臺送張內史侍母還蜀同毛袁監察三首

丁丑重九繁臺酒集 寄王憲使二首

寄崔內史病還鄴 早春宴黃宅

送右轄王子逼除赴嵩山之役以獄事

送余生南監 繁臺秋餞何子二首

再餞何子 喜李生自京師歸

送柳儀賓進 聖節表 中秋別鄭生

已卯元日內弟璣見過二首

送戴氏

寄毛監察

雪中鄭生見訪

雪中蘇生以詩見過

春初大道觀訪蘇生

寄陳浚

贈僧壤讓越人也嗜酒其居有借對軒

逢邾王子

徐子過別因而留宿

洪法寺遇鄉僧

送張生還金齒二首

送鄭淳入閩

送王左史入覲

送姪竹赴京聽除

送長垣尹赴召二首

寄熊御史塞上

秋日王子臺上

酬錢子錫山之招

送王子如淞江

晚過孟氏雷雨邊至會王子亦來二首



僧園秋集同田生二首

春日宴山泉王子之第同左田二子二首

酬贈閣老劉公四首 送田生讀書上方寺

登鐘樓答田秀才 別鄭生

送白帥留守中都 再送白帥

再送鄭生 譚劉二子過賞牡丹

春日寄題崔學士後渠書屋七首

小園花發譚劉二君訂遊涉夏始至席上三首

送呂先生四州衡聘 贈孟監司赴任三首

送譚子二首 贈林監察阻雨郊館

庭菊紛披有懷王喻二君子

晚秋王喻二監察見過二首

菊日任君見過 寄鄭生二首

贈答

邊君生日來訪時近中秋不虞雷雹二首

怪爾生辰日高軒特過吾秋驚飛雹至雨逐去雲無

上壽須君子同聲愧老夫毋勞問隱顯乘月有清壺

二

雹過天仍雨庭空晚復雷連牀慨往昔阻馬得徘徊

暗藥香賓席秋燈焰壽杯非君有家慶肯放夜輶廻

繁臺院閣餞沈子之雲南并懷劉子二首

斗酒重陽後危樓萬里前停雲忽蔽地起鶴故橫天



斜日留傾蓋踈花影別筵忍看驄馬使遙向碧雞邊

二

豈料吾劉沈提刑繼入滇經過此臺上共醉菊花筵  
日落杯光動樓空海色連無論即萬里身世轉蓬前

送姪木甥嘉會試

二子趨南省同車向北燕苦心衝鴈雪得意佇花天  
合浦珠光會豐城寶氣連諒懷鵬舉志吐膽鳳樓前

繁臺夕餞翟子三首

野館逢君日相逢復惜違暖畦花尚發冬樹果初肥  
斧鉞從天至家山傍海歸懸知稱慶處不獨錦為衣

二

邦君榮大禮星使返三台路指東方入尊留南郭開  
館深松自靜筵暮月還來明日山河異無言不醉迴

三

為慕梁臺勝紆君駐馬觀風霜當夜急樓閣近星寒  
醪酎猶更燭徘徊數倚闌知君有家國忍向北雲看

丙子生日答內弟璣

今夜今年聚誰知骨肉稀汝猶悲燎粥予豈那于飛  
對火霜威入侵杯月色微斗斜燈更續不是醉無歸

雪後寺集夜別王子

僧夜晴遊地月高鐘磬聞塔光斜照雪香氣上蒸雲  
客向杯前聚途於醉後分別離誰不爾繾綣獨斯文



早春懷上方寺

此寺城中僻邊城野四圍青天直塔上落日稱僧歸  
殿古松風入臺春草雪微覓碑吾不懶所慮鳥驚飛

春日過李氏因贈

偶憶孩童日能禁老大悲向來門巷接長是酒筵隨  
禮樂儒門舊風花世路疑不須辭夜飲春月正逶迤

送鄭生

河水未盡脫怪爾駕舟還言向金陵去春登江上山  
淶波元楚徼芳草自吳關寶劍男兒在那憂行路艱

柬張含

戰國侯嬴里梁園李白杯夏驕惟溽雨秋弱尚鳴雷

病館經旬滯歸旌萬里催別書期早寄莫俟北鴻迴

憇長葛端壁寺偶遇使人王卿齋監察毛君

詩劄到困頓中口占馳寄亦咎遊山之約

遠爲長葛憇忽接許昌吟不覩暮雲句那知春別心  
早花連穎岼晚日下嵩岑咫尺盟難踐何須問古今

月夜柬張含

風餐涼雨過露坐晚林幽汝對梁園月孰如金齒秋  
常星皆北拱滇海獨西流萬里清光再應懷今夜遊

送張含

明發車南指滇城更復南秋驚洞庭葉雪壓貴州嵐  
念汝此行遠求官今尚淹保昌山塢側好藉望京庵



秋日讀王子赴江西時諸曹贈行篇什感賦  
接攬西江轡同懷振鐸年匡廬並突兀鄱水日悠然  
子進薇花省予歸蓮葉船梁園邂逅地把酒對秋天

繁臺送張內史侍母還蜀同毛袁監察二首

幸值高秋霽何愁蜀道難顧瞻知國念跋涉爲親歡  
露菊沿江熟風林過棧寒故園如有夢應在五雲端

二

翰苑飛名久梁園接席初文談白日下涼露碧林踈  
劔閣天真險巴山錦不如饌親知盡樂日日有姜魚

三

飲暮不歸去繁臺秋正深侍臣軒偶遇驄馬酒同臨

去國三川路停雲萬里心西南鴈不到吾遲尺魚音

丁丑重九繁臺酒集

高會今秋始重陽逐歲同上臺寒日午開閣古林風  
且約黃花醉休嗟白髮翁舊游不須問天際有飛鴻

寄王憲使二首

反側須開縣安危亦仗兵饒山夾岼密鄱水向秋清  
部使輕裘入餘黎裹飯迎怪來服從易爲懼靖南名

二

傳爾提刑地思予攬轡游湖山不改秀蛇虎向來憂  
賈劔元能事寒帷當此州范公芳未泯亭在北山頭

寄崔內史病還鄴



漳浦新歸客文園舊病身乾坤金馬外杖屨碧山春  
書合虞卿著耕非桀溺倫漢庭文賦筆誰及茂陵臣

早春宴黃宅

岐路風花裏乾坤醉眼中事隨年共異春與昔還同  
相聚今何夕相看各已翁夜和杯更暖休負燭花紅

送右轄王子逼除赴嵩山之役以獄事

遽有嵩山役恰然逢此春旌旗拂岫入車馬駐蘿新  
坐愛溪花發行憐寨獸馴時雷蘇萬物君重係羸民

送佘生南監

江門柳色暗四月浪花高爾抱魚龍志休隨雀燕曹  
金山入紫氣壁水動青袍倘慮音書隔南風有順毛

繁臺秋餞何子二首

會少憐君暫臺孤引望頻清秋屬過鴈落日有征人  
華嶽元通洛黃河不棄秦異時愁獨上千里見嶙峋

二

候吏催遲暮遊人怨解携十年內供奉萬里竟關西  
地古饒文物時平罷鼓鼙巡行有佳興應徧絕嵯題

再餞何子

武場重布席文士此分襟人世東西路秋天旦暮陰  
杯光搖弱草庭色下飢禽他日關中使無忘汴上音

喜李生自京師歸

北極星齊入中原爾獨歸田園自松菊身世有庭闈



魚可一錢買花常四季飛感時臺莫上恐濕賈生衣  
送柳儀賓進 聖節表

萬國生辰表天王北狩時雞鳴元紫禁虎拜亦丹墀  
漢樹霜楓古堯燹露莢移無辭醉宮酒當是舊朝儀  
中秋別鄭生

別離誰獨免此別是中秋爾上袁宏艇予登庾亮樓  
羽衣飄北檻漁笛起中流炯炯共明月那堪兩地愁  
已卯元日內弟璣見過二首

內弟元朝過柴門午一開柏尊吾足辦椒頌爾須裁  
天地冰霜變江湖日月催鬢毛斑欲甚誰忍復春來  
二

汝今年四十而我八年多世路憐書劍生涯笑薜蘿  
遊將花並放醉擬鳥同歌莫問朝元日傷心是玉珂

送戴氏

兩河飛雨盡萬里不塵沙白馬朝天客春風御柳花  
聲名新上計袍笏舊傳家諒有蘭臺擢應難捨伏伽

寄毛監察

江漢歸鴻鴈乾坤罷虎狼薜蘿吾故土驄馬爾何鄉  
岍樹霜先赤籬花晚自黃向來杯酒地臺柏但蒼蒼  
雪中鄭生見訪

萬戶風花起吾門爾一開驚看破履跡笑指白鬚來  
驢爲登橋熟船非訪戴迴今朝梁苑賦合試賈生才



雪中蘇生以詩見過

楚楚眉山喬儒林  
羨白眉揭來白雪裏  
惠我陽春詞  
結綬終相慶  
投珠莫自悲  
長安馬蹄疾  
是爾看花時  
春初大道觀訪蘇生

草生壇雪盡  
宛宛孤雲輝  
怪爾黃庭罷  
雙鵝不換歸  
窻鐙留夕照  
欄竹伴春暉  
安得頻過此  
談玄兩不違

寄陳浚

借問垂雙翅  
何時奮一飛  
黃金不易就  
黑髮漸應稀  
山雪騎驢出  
江風捲釣歸  
所嗟冠蓋地  
獨爾薜蘿衣  
贈僧懷讓越人也嗜酒其居有借樹軒

訪舊來東社  
焚香對病禪  
素琴真與寂  
濁酒反通玄

隣樹當經牖  
春花落講筵  
不逢支遁語  
誰解越中傳

逢郊王子

相思汝水月  
相見帝城春  
紫邏雲煙迥  
青門柳色新  
豈如題鳳侶  
疑是好鵝賓  
醉即揮鞭別  
金龜報主人

徐子過別因而留宿

豈是陳蕃榻  
能淹孺子棲  
無言向春月  
難寐及晨雞  
鈎幔回牕色  
梳頭過鳥啼  
如何艷陽節  
與爾惜分携

洪法寺遇鄉僧

爛熳春遊處  
重來冬日淒  
風松猶故壑  
露葉已新蹊  
廢井浮陽出  
魏阡凍霧棲  
逢僧話鄉曲  
寒望轉萋迷

送張生還金齒二首



萬里來何事三年此復過高秋鴻鴈下落木洞庭波  
歲月長途老風雲後進多百蠻家更遠自愛莫蹉跎

二

大雅流重譯殊方挺上才批鱗書幾上塌翅首頻回  
白髮南荒路秋風北宋臺三杯邂逅地爲爾一徘徊

送鄭淳入閩

江海發春濤南浮二月舫花行浙口盛雲近武夷高  
土布離鄉貴衫雞詫客號延平津倘過珍閩匣中刀

送王左史入覲

帝里花應待王筵醴暫違舟從春水上人是錦衣歸  
日月瞻新袞風雲壯舊畿辭朝君即返莫賦北山薇

送姪竹赴京聽除

皇王寶曆開汝上黃金臺氣色三光正人心萬國來  
拜除將檄入辭謝袖香迴幸會風雲路行伸驥馭才

送長垣尹赴 召二首

君赴蘭臺召誰看此縣花久知驄是馬當許鷺隨車  
日月新明主乾坤舊一家異時縑帛賞應首及孫伽

二

要地微名尹新朝急俊臣班升玉笋曉臺散紫蘭春  
萬水元趨海羣星自拱辰誰言大河上白首有垂綸

寄熊御史塞上

漢官持斧處天險惜離羣塞口孤城斷峰腰細澗分



胡天秋更慘殺氣暮還雲定有憂邊計緘馳達聖君  
秋日王子臺上

暑霽名王會臺成上客過清秋踈草木落日上笙歌  
天地銜杯盡風雲傍檻多聖明今御極誰復慮干戈  
酬錢子錫山之招

南遷公約我北望我懷公陽羨春芽秀荆溪早稻紅  
乘槎伍胥口采藥洞庭東何日酬吾志江濤日夜風

送王子如淞江

寶劍寒無色蒼然海上行異書探戰伐高論動公卿  
何日爲毛遂前身是賈生誰憐同學子章句獨虛名  
晚過孟氏雷雨遽至會王子亦來二首

王褒真畏友孟浩復多才下馬雲徐暮開尊雨驟來  
疾雷當戶落驚電觸簷迴坐待明星出無疑曉漏催

二

霽月出還沒騎雷東復西千門螢火動六月候虫啼  
共是天涯客能忘雨後題吾詩催仗汝好放片雲低  
僧園秋集同田生二首

榴竹晴相媚秋光滿給孤微風捎果重殘暑入林無  
寶塔金杯映青天白鶴呼不須談浩劫吾醉亦忘吾  
二

自笑紅顏日僧今白首看秋風修竹過臺殿碧梧殘  
鐘磬昏仍起壺觴醉不乾塔層思盡上恐逼斗牛寒



春日宴山泉王子之第同左田二子二首

入殿笙簫合開筵錦繡圍苑枝春競發臺日晚猶輝  
語燕窺吟管飛花坐舞衣二豪同酩酊與爾月中歸

二

已恨韶華劇能飛爛熳游鶯啼簷對換蝶戲檻花流  
賓客朝開苑笙歌晚入樓但看今會者孰與漢枚鄒

酬贈閣老劉公四首

雷奮龍猶臥雲俱鶴自閑一杯莘野月雙屐謝公山  
貴客常辭避田夫數往還桂庭秋偃蹇公醉拉誰攀

二

大號更嘉靖明公會古稀老驚詩律健閑愛醉游歸

庭戶羅花竹兒孫導綵衣向非千仞覽那見太平輝

三

壽席秋能半賓庭月故圓前身金粟佛今代玉堂仙  
兔巧元供藥龜靈豆筭年蠅頭燈下字猶注紫霞編

四

野綠情真逸山香望獨高酒嫌裴相淺詩掩樂天豪  
公實當三老吾虛受二毛人遐室幸邇音惠莫言勞

送田生讀書上方寺三首

嗜靜甘違俗藏修合就僧綠移開徑竹寒掃護窓藤  
殿閣秋陰下琴書爽氣增不須匡氏壁常有玉蓮燈

二



空同集卷十五  
寺壓孤城斷堂開積水園一僧當茗竈羣鷺狎荷衣  
被酒時登塔持書晚坐磯鶴騰知客至嗟汝詠而歸

三

涼雨滿庭戶冷然松桂幽隔雲清磬濕向夜一燈留  
螢火輝書幌烏啼上佛樓諒多今古意先著宋春秋  
登鐘樓答田秀才

老足秋能徙朋游嶽益豪眼當孤閣放身已百層高  
霜壁搖朱杞風簷落白蒿生平望東海一釣有連鰲

別鄭生

白首還離別長途倍苦辛憤時惟按劍避世謾垂綸  
江海烟霜日乾坤去住身臨河見雙鴈杳杳向秋旻

送白帥留守中都

幕府開淮甸山河繞漢陵曉霜迎旆入王氣及秋澄  
駟臥銅牙澁矛拋綠蘚增黃金印如斗應有異時徵

再送白帥

聖主下龍章將軍入鳳陽地盤淮海壯天擁漢陵長  
祭戟新開府威名古辟疆卜年元萬世王道是金湯

再送鄭生

聞君數日住使我百憂寬池館杯觴易天涯故舊難  
久晴冬欲暖近水晚猶寒借取防身劍慙慙醉裏看

譚劉二子過賞牡丹二首

載酒來朋遠尋芳出郭遙遇花雙蓋住繫柳一驄驕



野席留香迥晴尊助艷嬌誰言闌百寶吾有玉鸞簫

二

學舞花將起矜歌鳥自來日筵隨蔭徙風袂入香開  
李白昭陽調姚黃洛下杯古今君莫問且促醉輶迴  
春日寄題崔學士後渠書屋七首

草閣臨何地花天想後渠傍墻應植柳俯岍幾跳魚  
好撰王褒頌休親郭橐書改元新禮制側席待相如

二

石白雲花熒湍青水葉香野情鷗鳥足紗帽世塗忘  
問字舩能過聽鶯客不妨無言渾是暇當有草玄忙

三

鮑客春還鄴崔渠遂盛傳水溶漳岍日草碧魏城天  
徑竹竿竿秀汀花朵朵鮮但無醒酒石物物勝平泉

四

敞敞渠邊屋輝輝座右銘竹琴晴愈靜蘿燭夜還青  
洹水明卿月陳家聚德星泥中雖近戲僕隸解談經

五

是否龜蒙鴨將無逸少鷺內官聊一戲道士敢頻過  
自坐蒲磯飲誰攀桂擢歌絕絃知不易白眼向山河

六

賦筆多崔瑗朋車媿呂安碧渠何日到雲樹一春看  
南果枇杷活西郊苜蓿寬覓君終繫馬艤棹是何灘



七

且養岷山鳥休焚學士魚窮通不在我水竹漫成居  
綠薜深藏屋丹花淺映渠幾時朝聖主人擬治安書

小園花發譚劉二君訂遊涉夏始至席上

三首

尚有春留賞無言客過遲砌紅殘芍藥園綠半茶縻  
邂逅情真倍追隨酒莫辭有懷君盡放得意是佳期

二

繾綣杯侵夜迂徐月轉庭醉尋松影立涼愛竹風聽  
老去朋情恕年來世事經玉繩天歷歷誰識少微星

三

涉夏榴能綻深更客尚遊羣行逢樹問獨立為花留

就月還移席呼兒重洗甌醉醉橫北斗曙角起城頭

送呂先生四川衡聘

大省文衡重名師禮聘遙閣雲寒暑旆棧月引星軺  
古帝蠶叢國今人駟馬橋好將揚馬輦收取貢清朝

贈孟監司赴任三首

孟嘗知汶上縣有寄我之作

南輟江湖棹東飛海岱旗勇辭知至性強起為名時  
氣節聊城箭文章孔廟碑秋風立馬地莫動季鷹思

二

汶上篇仍在齊東節重過繞臺新柏秀匝縣舊花多  
海色搖行憶山雲護詠窩談天君一問稷下近如何

三



麋鹿游山性蛟龍卧水心得雲終一起食野不孤吟  
汝去觀滄海予常慕孔林何時挈尊酒同躡太山岑

送譚子二首

國謚逾年至王臣觸暑行水花邀去節山鳥勸離觥  
夕客交人廣携家念土輕玉筵頌扇日應注使回名

二

聚賞蜂初課分携燕已雛泥驚落夏簟花憶倒春壺  
水路風旗進晴舩暑氣無五雲赤日外縹緲是皇都

贈林監察阻雨郊館

積雨淹征旆曾城隔論文一尊真惜酒萬里正橫雲  
京國聽謠屬閩江道派分美名吾實羨何處接高芬

庭菊紛披有懷王喻二君子

鴈急秋真晚園空菊自黃露團畚有色風度不隨香  
却憶初開日君來夜把觴忍今看爛熳獨繞碧籬傷

晚秋王喻二監察見過二首

自種吾堂菊無人共把卮昨來三徑雨忽與兩驄期  
檻霽花逾爽林寒酒故隨坐忘俱醅酹莫遣白衣知

二

霜日來驄並晴杯沈菊頻古今元逆旅天地幾間身  
鴈陣寒從急籬香晚自新豪吟不知夜圓月在高旻

菊日任君見過

菊筵開遇雨秋色轉增孤冷翠元浮席流香故灑壺



空同先生集卷三十一  
其一詩  
蒞沾卷袖摘徑滑倩人扶莫謂無開霽斜陽酒重沾  
寄鄭生二首

故菊開誰對新醪悵爾違耳憎木葉下心與塞鴻歸  
兒女催蓬髮家園滯綵衣問君稱慶暇何處採山薇

二

節序仍黃菊乾坤更白頭文章寧益世衣食暫寬憂  
遇客誰談劍思君獨倚樓遠江寒細細似有北行舟

空同先生集卷第二十五

空同先生集卷第二十六

北郡李夢陽撰

詩 五言律詩一百首

贈答四十六首

月夜繁臺會兩監察首二送李生還郡二首

甥嘉北來出其謁逢于廟之作予爲和之嘉

時謫茂州判

送甥嘉之茂州次玉溪侍御韻三首

郊園遲王豸使不至 王豸使至復有此賦

王豸使旣返東月皎升乃與李曹二子徑觴

吹臺之巔口占柬王子



秋日呂公西園同玉溪侍御二首

西園酒半會玉溪侍御瓜代報至再賦二首

見和君病起鬚白輒有所贈亦答其酒過

和鄭生行經鳳陽 初冬見雪和鮑生

鄭生至自泰山二首 寄鮑崇儒

送趙訓學滿歸二首 秋過內弟漫賦二首

贈陳生二首 七夕雪臺子過東庄

贈程生東遊 寄題高子君山別業

立春柬鄭生問其秘病

送劉尹赴徵 冬日寺集觀趙帥射

丁亥寒食柬養素

喜程生自吳中回致五嶽黃山人音問二首

伏日載酒尋高司封讀書處

懷五嶽山人黃勉之 郊居柬竹溪子

聞吳郡黃山人將遊五嶽寄贈二首

東庄冬夜別程生自邑

己丑八月京口逢五嶽山人

京口楊相國園贈五嶽山人

時序四十四首

九日黃花鎮 九日應變齋居

九日慈恩寺閣二首 生日寫懷

十二月十日 臘日退朝口號



七月十五月食不見追往

月食

元日沐上雪霽

清明河上寓樓獨酌

庚午除日

辛未元日

中秋南康

廬山九日

上元滕閣登宴二首

九日薛樓會集二首

清明曲江亭閣

端午贛州晚發

南康除夕

南康元夕二首

元夕風起南康

乙亥立秋

中秋二首

戊寅元夕

中秋喜客携酒見訪

十月月食不見

巳卯元夕

庚辰清明東郭

九日上方寺二首

至日夜雪

癸未中秋不月

乙酉上元上方寺

丁亥立秋

中秋亭會

戊子元夕

巳丑五日

五日庄上集

悲悼十首

乙丑逢先大夫誕辰是歲適蒙 恩詔加贈

製字四十用寫哀痛

兄以西堂落成蓋悵然有念於二親余心交

痛頌義追德爰成茲詠焉

讀直道陳公祚遺事 哭郡守郝公



哭張子二首

謁平臺先生墓

溫將軍輓詩

聞鄭生死豐沛舟中

贈答四十六首

月夜繁臺會兩監察二首

路葉風交落臺驄晚並行時寒物色換意遠世緣輕  
異國同觴地危樓片月情暝烟凭檻裏汴水凍猶聲

二

萬里危樓夜中天朗月時快心真託酒凝望轉停卮  
野色霜元迥林光燭並移依依簷畔鵲先占獨栖枝

送李生還郡二首

宦美庭闈隔情深郡檄催臘江舟自穩暮日首頻回

洞橘黃金摘吳魚白雪來汝親知更樂願展治邦

二

伯道吳門水梁公冀北雲依親歲聿暮趨郡袂還分  
臘動蘇臺色春回震澤薰重過應未遠良吏漢廷聞  
甥嘉北來出其謁逢干廟之作予爲和之嘉

時謁茂州判

汝謁雙忠廟徘徊幾度吟暴雲連海白積水帶城陰  
自攷看碑淚誰知駐馬心未須悲遠竄不死是恩深

送甥嘉之茂州次玉溪侍御韻三首

已詫齊東謫能堪蜀道行自甘窮塞竄爭柰倚閭情  
劔閣雲中棧蓬婆雪外城大江秋見底待爾濯長纓



蜀道元非易人言此更難虎風生萬壑蛇徑動千盤  
北望常思闕西來不爲官無言羗性異汝當郡民看

三

雪山天地外經夏雪難消氣冷三城戍光通萬里橋  
誰言州不好汝去路寧遙縱使胡笳夜猶能夢入朝

郊園遲王豸使不至

豈少銀鞍馬衝泥許故游清風微進草晴日澹生秋  
掃徑童將倦看籠鶴但收異時高李會佳跡至今留  
王豸使至復有此賦

晴游番幸雨午出更便風柳重陶潛宅花霑御史驄

達人元野性濁酒本村翁酌罷桑麻晚歸燈一徑紅

王豸使既返東月皎升乃與李曹二子徑觴

吹臺之巔口占柬王子

王歸不待月二子共登臺天地劃然皎山河相盪迴  
垂鳴崖底葉鴈影掌中杯爲問山陰客還能棹雪來

秋日呂公西園同玉溪侍御二首

圍勝城能曲臺高野更秋席陪驄馬出情爲碧雲留  
移坐鋪林葉添樽面水流潛思歌舞地指點問王州

二

入院看垂柿臨畦羨引泉寒萋自滿地踈樹不妨天  
野老疑旌旆林鳥下酒筵無云但游衍公意在桑田



西園酒半會玉溪侍御瓜代報至再賦二首  
北使還朝近西城返照深霜情留果實晚意付花心  
風助林臯爽雲橫海嶽陰茲游如在念應有寄南音

二

勝地留賓切離筵散酒遲網魚生躍案摘棗脆連枝  
草夕鳴蛩動天秋過鴈知河橋明日事願盡掌中卮  
見和君病起鬢白輒有所贈亦答其酒過

詫汝鬢添白將無病苦形眼前真過隙身外是浮萍  
客到留碁局兒呼檢藥經昔人曾頌酒吾意不如醒  
和鄭生行經鳳陽

浩蕩興龍地盤旋踞虎形海吞淮水白天插楚峯青

帝宅精靈聚陵宮虎豹扃萬年禋祭禮有道賴朝廷

初冬見雪和鮑生

密雲初布暝踈雨忽成花氣淺冰從薄寒輕白自斜  
敝裘誰念汝孤棹獨思家江上冥冥鴈春風遲去槎  
鄭生至自泰山二首

昨汝登東嶽何峯是絕峯有無丈人石幾許大夫松  
海日低波鳥巖雷起窟龍誰言天下小化外亦玉封

二

俯首無齊魯東瞻海似杯斗然一峯上不信萬山開  
日抱扶桑躍天橫碣石來君看秦始後仍有漢皇臺  
寄鮑崇儒



去日猶零雪庭葵遽復花新詩誰和汝久客自成家  
水國乾侵夏如風莽帶沙長淮日易暮珍重早棲鴉

送趙訓學滿歸二首

六旬千里客九載一羶歸路遠琴書重官貧妻子饑  
塞雲迎老髮河色戀征衣會有秋行能關山新鴈飛

二

宋代陳無已唐時鄭廣文道高官獨冷名美世同聞  
汝挈一羶去予憐雙袂分潛潛白首淚長向渭西雲

秋過內弟湯賦二首

赫赫乘龍地蕭蕭羅雀門桑麻猶世業書史但兒孫  
數過看顏帖今來爲菊樽顯親君太晚願化北溟鯨

二

主賓俱不飲相對坐同深幸有黃花興無論白髮心  
游虫紛落日高葉下踈林靜裏聞鴻鴈疑添往歲音

贈陳生二首

少小期鵬運于今尚未飛蒿深仲蔚宅鶉結憲生衣  
背郭元桑樹臨河只釣磯奉親知不苦饌有白魚肥

二

白屋山中相黃河水後田家無釀酒秫人索買書錢  
雨過雲流野風來浪接天行行牛角上猶掛古人編

七夕雪臺子過東庄

村落元相接園林亦互游酒天携榼就花夜對牀留



忽爾雙星候冷然萬木秋誰期白頭日蕭灑共丹丘  
贈程生東游

鄒魯風猶在芒碭氣有無霸心空大澤儒行乃長途  
野艇冰迷鴈村樓凍集鳥無勞怨歲暮隨處是江湖

寄題高子君山別業二首

君山者江陰縣之北山也高子獲焉於是自稱  
君山主人予聞之爲作君山詩寄焉

一山背城起萬古號爲君秀攬江心月雄吞海面雲  
金陵通地脉玉港發人文羨彼投簪客中年卧紫氛

二

季札墳邊業春申邑後山一江平展鏡兩港曲成環

不雨雲烟擁長春草木斑隱君梯萬丈倘許世人攀  
立春柬鄭生問其愁病

天涯春又至游子近如何病久詩難減鄉遙夢易多  
藥苗春尚雪舟楫海初波舊業方山下東風偏綠莎

送劉尹赴徵

戀別當炎暑淹留到夕暉徵書昨日下循吏古人稀  
風樹涼移席庭萱晚就衣明朝五雲裏爭看兩鳧飛  
冬日寺集觀趙帥射

萬里橫霜氣長風快順毛將軍隻弩發壘中兩鴻號  
取石敲新火開鮮弄寶刀回頭問僧者何處得醇醪

丁亥寒食柬養素



細雨穠花候高齋獨坐辰春風無病物清世有閒人  
樹濕鶯穿穩泥香燕下頻遙思養素者何處卧松筠  
喜程生自吳中回致五嶽黃山人音問二首  
爛熳梁園樹江舟爾恰迴苑桃惟舊列墻柳半新栽  
枝爲來人媚花迎笑口開吳門春更好幾上虎丘臺

二

黃子吾真畏程生爾更奇江城傾蓋日渭北暮雲時  
寶劔神終合冥鴻性不移忽思千里駕慚愧昔人爲  
伏日載酒尋高司封讀書處

鄭門古城曲小築成幽園爲厭朝簪擾兼辭人境喧  
矮堂交雜樹炎日駐游軒默默林中意相看對一尊

二

養寂爲園卧尋幽當暑過林深得日薄地靜覺蟬多  
舊業元秔稻新亭復薜蘿誰憐朱紱客遽戀白雲窩  
懷五嶽山人黃勉之

吳下元多士黃生更妙才心常在五嶽名已動三台  
系自汝南出文從西漢來冬天難見汝翹首獨徘徊  
郊居東竹溪子

當春美杯醖花落恨紛紛重來日復幾飛葉滿秋雲  
寒流下鴈影古戍噪鴉羣殘菊猶堪把長謠獨憶君  
聞吳郡黃山人將遊五嶽寄贈二首

昨報三吳客將尋五嶽遊薜蘿應製服春水正宜舟



二室雲中峻三花烟外浮住居吾幸邇先肯到嵩丘

二

天柱峯頭雪蓮花嶺畔雲朗吟惟李白獨往更黃君  
婚嫁今應畢藜鞋有幸分共躋恒岱徧歸著五遊文

東庄冬夜別程生自邑

萬里孤村夜踈燈對語心風枝時響牖寒月故明林  
秦隴新遊壯江湖舊恨侵側知南橐重爲有華山吟

已丑八月京口逢五嶽山人

夜雨清池館晨光散石林一舟相過日千里獨來心  
樹擁江聲斷潮生山氣陰異時懷舊意應比未逢深  
京口楊相國園贈五嶽山人

遠客乘秋至名園水竹分林寒番易雨池靜合偏雲  
卧疴思知己逢君愜素聞蕭蕭綠雲裏誰解有論文

時序四十四首

九日黃花鎮

黃花遇九日風雨不逢花水湧石梁斷溪吞山郭斜  
將軍午宴客欲醉忽聞笳困苦墩樓卒經年誰見家

九日應變齋居

時變逢搖落齋心對暮天未擒可汗日新起秦陵年  
聽鴈真無那看花益泫然將歸思臨水愁絕宋生篇

九日慈恩寺閣二首

寶地元依海珠林更假山登臨重九遇城闕五雲還



歌吹喧侯里邊烽入漢關望鄉歸未得能對菊花斑  
二  
勅寺西園湖秋林層閣孤天空木更響風落帽還扶  
魚群集下躡鳥影鏡中趨泛菊看山海寒烟暮有無

生自寫懷

臘日明朝是浮生此歲過黃雲薄暮積白髮向來多  
壯士看雄劔幽人戀薜蘿異時論出處竊慮各蹉跎

十二月十日

今日吾兄壽蕭條自舉觴燕山非故里汴水亦他鄉  
河鯉行思海原鵠飛畏霜客居憐小姪潛望白雲長

臘日退朝口號

霽色催寒臘鷄聲下紫宸至尊深抱戚粥食罷嘗新  
宮霧戎戎薄城鴉欵欵馴小臣憐歲序翹首待陽春

七月十五日食不見追往有嘆

月食今年再中元與上元春晴燈火亂秋暝雨雲繁  
漢將高城壘胡塵滿塞垣孤臣萬古淚偏灑秦陵園

月食

有明終不滅暫掩亦何虧萬國喧呼地三更鼓角悲  
輪生桂與發光復兔還隨顯晦每如此人生祗自疑

元日沐上雪霽

旭日薰江檻晴雲麗竹扉簷花雪色靜庭篠碧滋歸  
歲月高兒女行藏老蕨薇眼看人共醉椒酒不堪揮



清明過上寓樓獨酌

一自違京邑飄飄嘆此遊  
桃花是往歲竹葉轉新愁  
暮雨津城樹森帆水國樓  
汴河堤上柳烟色似皇州

庚午除日

于今將四十始悞昔年非  
白髮誰能那紅顏我漸違  
行藏沙上鳥日月故山薇  
悵望勞歌起風河柳色歸

辛未元日

萬事渾如昨蹉跎四十臨  
取途傷老馬聞道愧前禽  
日變風雲氣春生海嶽陰  
趁時聊物賞此外更何心

中秋南康

同是中秋月匡廬只自看  
故臨石鏡上偏傷落星灘

北望關山隔南飛鳥鵲寒  
鳳歌喧太液光憶滿長安

廬山九日

廬山隨晚坐江漢淨秋襟  
九日黃花雨書堂紅葉深  
細雲飄古帙寒兒吼空林  
不用風吹帽尊前有靜琴

上元滕閣登宴二首

滕閣上元宜章江登宴時  
衣冠還大國唐宋自殘碑  
燈火闌堪凭風塵淚欲垂  
黃雲驅日暮回首見征旗

二

陽浦通新霧陰城帶古樓  
君王罷歌舞棟宇白雲留  
草色歲年換客心江水流  
暮昏仍一望燈火萬家州

九日薛樓會集二首



不倦登樓目遙憐秋色重楓村疊暗浦霜日抱孤峯  
楚越窻中地江山戰後容倚闌渾不語吾欲採芙蓉

二

恰送重陽日能禁孤鴈來林稀山盡出風順櫓齊開  
沉是薛樓會難孤江上杯菊芳看莫厭秋色異鄉催

清明曲江亭閣

寒食花爭麗豐江柳獨深此行元慷慨落日更登臨  
浩蕩五湖際風煙千里陰坐看舟楫急徒切濟川心

端午贛州晚發

戲倦龍舟返吾驅彩鷁行晚天開古驛轉眼過孤城  
嫋嫋雲生瀨悠悠弟憶兄泛蒲雖念我寧解嶺邊情

南康除夕

畏途值除夕會我得投閒海雪寒城古江春碧草還  
星河掛嶽樹燈燭熨歸顏竊計臨家日薔薇滿舊山

南康元夕二首

四海逢今夕孤城有獨身干戈猶野哭梅柳自江春  
月向平湖滿銓於靜夜親罷誼風乍起嗟爾楚南人

二

嘈嘈市鼓動松月靜吾門燈火思今夜風光滿故園  
天明淹舞袖塵暗失游軒老鬢江山異愁看旌旆繁

元夕風起南康

嶽雲黃裊裊夜半忽淒風度市春燈亂穿梅野樹空



八依青岸酌月漾碧湖中擬盡江城賞無欺蠟炬紅  
乙亥立秋

今日秋風起連年濕病蘇應時微雨歇侵曉斷雲徂  
已復寒蟬集空嗟蕙草孤步檐驚驟健一葉下庭梧

中秋二首

漢江江上月今夕去年看尚憶峴山曲秋城波色寒  
故鄉仍節序衰髮且儒冠桂子真誰種天空落未乾

二

輝輝象星沒宛宛孤輪高萬古今宵月青天首自搔  
度閨螢息照懸樹鳥分毛寂寞枚乘筆空懷八月濤

戊寅元夕

春色閨冬後元宵驚蟄邊軟塵欺月散繁火奪星懸  
車馬中原地笙歌全盛年無勞驗花燼難測是皇天

中秋喜客携酒見訪二首

節有吾家會天能此夜陰蟾蜍逐月沒桂子落雲深  
同是悲秋客况懷天柱心引盃光欲閃徙倚向東林

二

雲出真誰料月行應自如闇然花逕裏忽枉故人車  
落葉近坐滿清光中夜舒杯來不須却此意合躊躇

十月月食不見

頻食天應苦當宵地故陰悲生十月雨狂阻萬方心  
武解香燈聚霜林鼓角沉復光何處滿願逐翠華臨



已卯元夕

此夜門還閉中天月自看春催桂應發雪映兔猶寒  
兒女添燈鬧隣家品笛殘少時思可笑走馬向更闌

庚辰清明東郭

少日歡游處逢春老大悲強持盃酒勸怕遣落花隨  
草木梁園在山河宋殿移上墳人盡返岐路獨含思

九日上方寺二首

賞時爭上塔乘月復登臺地盡中原入天空秋色來  
望鄉番恨鴈有菊且銜杯却憶龍山帽徒增醉者哀

二

天地踈秋色樓臺敞客歌遠江寒自白落木晚堪多

月為銜盃出鴻於鳴磬過霜橫不歸去吾意在烟蘿

至日夜雪

至夜還深雪幽心獨小堂光雖奪片月寒恐妬微陽  
壓竹寧迷翠沾梅祗辨香一聲何處鴈翅濕且高翔

癸未中秋不月

碧桂行青鳳嬋娟集玉樓世人寧解覩天意漫陰秋  
雪逼初光布星隨滿夜收開晴即是月但遣一尊留

乙酉上元上方寺

地愛僧林僻人邀燈節游緣塋朝借馬改路晚登舟  
春水鳧鷖滿夕陽鐘磬幽相留待明月簫鼓在中流

丁亥立秋



火多常病熱殘暑特相欺今日涼風至颯然林竹披  
聞鷄每起早省稼獨歸遲天地蕭條意何須一葉知

中秋亭會

老去真耽月更深且醉遊影沾如畏露光冷是分秋  
蛩故吟清酒蟾應笑白頭恒星藏不見坐待彩波流

戊子元夕

皎月臨元夜和風入始春過冬猶望雪思世轉愁人  
歌館喧鳴鼓遊車匝暗塵黑頭宜努力吾髮已如銀

巳丑五日

往歲沾宮扇含香拜玉墀只今飄白髮刈麥向東菑  
樹樹鳴蜩日家家望雨時萬方多難意誰達聖明知

五日庄上集

園樹日佳色黃鸝時巧音美人翮紫馬携酒入花陰  
文席鋪能坐蒲觴乾自斟蜩鳴雖頗聒流轉是天心

悲悼十首

乙丑逢先大夫誕辰是歲適蒙 恩詔加贈

製字四十用寫哀痛

冬季十二日

老大思童日詩庭儼昔趨羈孤萬里外優渥死生俱  
寂寞臨花誥幽冥列大夫西雲白蒼莽灑血望松梧  
兄以西堂落成蓋悵然有念於二親余心交  
痛頌義追德爰成茲詠焉

矯矯江都相妻涼楚穆生家貧無立業道大不求名



破甑常蛛網空除任鳥行肯堂兄不忝應慰九原情  
讀直道陳公祚遺事

上主能容直當言敢顧身累朝傳諫劄萬死作歸人  
古廟穠花晚孤墳勁草春從來汨沒士特筆在詞臣

哭郡守郝公

征歛無休日斯人不末年曾聞溪虎避早見壁魚懸  
頌碣留邊郡銘旌拂塞天九河一孤塚愁絕海門烟

哭張子二首

張子者平谷張子禴也以都御史鎮遼東顯矣  
然無何卒李子者張之舊僚也聞之哀焉於是  
作哭張子一章語曰歲在龍蛇賢人嗟張之卒

庚辰歲也

虎豹威邊日龍蛇哭爾年故人今若此吾道合潛然  
部曲歸旌擁風雲舊國連薊門秋草徧何處是新阡

二

翰海龍真泣遼陽鶴竟歸壯心元鐵石神爽尚旌旂  
光繞新埋劔香殘舊賜衣至今生仲達猶怯孔明威  
謁平臺先生墓

豈說嬉遊路今成昔雍門平生馬公帳四海孔融尊  
劔舄收殘草山河抱古原黃昏不忍去白日下蒿園

溫將軍挽詩

不見千夫勇誰開百戰圍門猶森畫戟苔已蝕金衣



俎豆諸郎奮山河奕世輝黃昏兩白鶴偏繞北邙飛  
聞鄭生死豐沛舟中二首

短劍英雄氣孤舟疾病身那知生別後竟作死歸人  
汴柳詩筒斷江花總慢新白頭交誼者灑淚向殘春

二

客櫬收豐沛歸舟渺越吳扶持有令弟書劍付遺孤  
墓草親朋隔山松舊業蕪當年走馬地魂繞孝王都

空同先生集卷第二十六



